

La religion catolica cristiana partegn a noscia storia

L dialogh coi musulmegn pel vegnir demò se sion forc te noscia fe

L raport anter le religion l'è n argument de gran atualità. N numer semper più gran de jent de autre tradizion e religion, soraldut musulmegn, taca a ruar ence te noscia picola val, n muie tiré dal lurier che porta l turism, i se cer n cartier, i se loga jù e apenamai che i pel i se tirà dō ence la familia. Noscia sozietà taca a doventar multiculturala. Saer se confrontar, crear n dialogh e i didar te soa integrazion l'è nosc prum doer. Ma no semper l'è sori, soraldut canche se se troa a se confrontar coi aspec, n muie desferenc, de la fe. Sun chest aon volù sentir l decan de Fascia don Giuseppe Da Prà.

Papa Benedet XVI l'ha dit che n dialogh inter-religious co l'islam no l'è possibol, che enveze se cogn chierir n dialogh inter-cultural. Che pissade Voi?

Don Giuseppe: "Te noscia val, per grazia, l problem no l'è amò gran fat sentù. Ge vel dir aboncont che la realtà de l'islam la è n muie desvaliva. Se pel troar n islam più moderà ma ence chel più fundamentalist, se cogn star ascorc canche se rejona per no pissar che l'islam sie dot fanatches e jent che va stroz a tor jù i Crisc. L Conzil Vatican II disc che te dute le religion l'è ite raes de chela verità che enlumena ogne om, donca ence te l'islam troon verità n muie bele, desche per ejempie che Die l'è un soul, misericordious, onipotent, l'è la vita morala e l cult de Die (orazions, carità e jajun), l'è n recognosciment parzial de Gejù e de la Madona, l'è l giudizie universal."

La Gejia cerela l dialogh co l'islam?

"L dialogh co l'islam su le verità de la fe no l'è possibol, perché l'è doi religion desferente. Per noi Gejù Crist l'è l Fi de Die, fat de ciarn e Die l'è Pare, noi aon l dogma de la Santiscima Trinità che ic no amet: sun chest teren no l'è possibol l dialogh. N enconter pel vegnir, dū mia opinion, sun doi troes: prum de dut tel respet, percheche se no l'è respet no se va da nesciuna man. Gio ge sporje l respet al mond de l'islam ma me sente de ge domanar ence a ic l respet per noscia religion. Dapò olà peles se pojar chest enconter? Descheche l'ha dit ence l Papa se pel se troar d'acort sui deric de la persona, sui temes de la pasc, de la giustizia, de la defendura del creat, chest l'è l teren olache se pel se troar. Su l'aspet dogmatic na. E fosc l'è ence giust che sie coscita. Nesciugn di doi cogn renunziar a so unicum de fe, percheche autament tant per noi che per ic doventassa na "abiura" de la fe, ma te l'inom de che pa? De nia! Dialogar l'è se confrontar, se didar un co l'auter a creser, a aer fe ogneun te so religion."

Se l teren olache se pel se troar donca l'è sun chisc temes culturai, co se fajel a jir d'acort con n popol che no tegn en considrazion la dignità de la persona?

"Chest l'è n gran problem: la dignità de la persona e soraldut de



L dialogh con cristiegn ortodosc è jà stat envià via ence te nosce parochie.

la femena. Te l'islam ge vegn permetù ai omegn de aer n muie de femene e ence de le repudiar. Da chiò vegn ence la difoltà de la Gejia catolica de conzeder maridoc mescedé anter religion perché l derit de familia te l'islam l'è n muie desvalif da nosc derit de familia. Nosce touse cogn saer a che che le va encontra. I fies, per ejempie, se l pare islamich mer, no i ge va a la mare, ma ai parenc del pare. L'è de besegn de proar a aer n dialogh amàncol co la part più moderada de l'islam. L'è valch paisc olache cristiegn e musulmegn proa a aer n dialogh."

L giornalista Magdi Cristiano Allam disc che un di mai de noscia sozietà l'è l relativism che met sul valif pian de verità dute le confescion e le ideologie. Che n pissade?

"La crisi di valores vegn da na crisi de fe. Te Fascia la fe l'ha generà l'umanità de la val. Se mencia la fe vegn a menciai ence i valores olache se poja la sozietà, soraldut de la familia. Chel che me cruzia l'è che aldidanché no se à la capazità de dir che na roba l'è mal, che l'è pecia! Me spieghie. Se cer de relativisar l ben e l mal ogetif i fajan doventar ben e mal sogetif. "No fae nia de mal e donca son a post...", chest vel dir se tor l derit de dezider che che l'è ben e che che l'è mal, te chest stasc l pericol de la sozietà. Se na certa part de jent se comporta a na certa vida, doventa lezit se comportar coscita. Ma l ben e l mal i vegn da Die. Fae n ejempie. Se tu ge ensegne a ti fies che chest l'è ben o mal secondo te, na di ti fies te dirà: "Secondo te l'è cosci, secondo me na!" Se enveze tu ge dis: "Varda che chest l'è ben secondo Die", tu mete l ben e l mal te zeche che va sorafora de te. L relativism vel dir proprio "gio no fae nia de mal e donca posse far de mia vita che che voi."

Da olà vegnel chest pensier? Èl colpa de la gejia che no è più bona de insegnar la fe?

"Pel esser. Gio no voi me tirar fora da la responsabilità. Ma l'è na serie de cauje. Gio no è emparà a viver da om e da cristian al catechism, gio è emparà a viver da om e da cristian fin da picol, da

canche mia mare me tegnia sun brac e me fajea cognoscer l Segnoreddio e donca l ben e l mal.

Pel esser che la gejia e la comunità cristiana te chest moment stente. Gio peisse che chel che no sion bogn de far l'è de far cognoscer la beleza de la fe. Se trasmet demò dogmes e verità. Ma gio peisse ence che la debolezza maora sie te la familia cristiana. Se domana i sacramenc, l batum e la pruma comunion e dapò? N'otra cauja l'è l benesser che seguramenter à soa part. No l'è che cognon se prear le vace magre per jir inant, ma cognon se dar na misura."

Allam disc che ajache se moscion deboi te noscia fe i autres ne veit desche na tera de conquista. Siede d'acort?

"Ben segur. Canche i disc che i musulmegn i ne tol i Crisc de la scole e dai ospedai i me fasc grignar. No me sà che te la Talia l problem de noscia fe sie i musulmegn, l vegn da noscia debolezza, noscia tema. Cotenc genitores se cruziei se te le clasc l'è l Crist? No i se cruzia percheche l'è te le ciase, ma chest l'è doventà na part de l'aredament e no l pont de enconter te na ciase. L problem no l'è de le autre religion, l'è nosc. Se trata de saer inout che noscia storia l'è na storia cristiana."

Che pissade del fat che ence i orientament religiosc scolastiches sie piuttosto tebesc sui segnes de noscia religion fin a ruar a dir che fossa miec tor jù l segn de la crouse te scolina per favorir l'integrazion de bec de autre religion?

"Secondo me le robe le valutate vardan da cajo a cajo. N cont l'è Trent co la tipologia che pel aer na scola de zità, altra roba l'è la val de Fascia. Gio personalmente no aesse mai dit de tor demez l segn de la crouse. No voi nience dir che l ge jissa emponù ai bec musulmegn. Se tacon a dir che per doi o trei bec la gran part cogn renunziar a i valores, no me sà giust."

Èl emportant l segn de la crouse te scolina?

"Na roba l'è la fe e n'otra l'è la religiosità. Noi no podon ge domanar a la scola de far n descors de fe (per ejempie enjignar i bec ai

sacramenc) percheche chest l'è doer de la comunità cristiana. Ma l'è doer de la scola mantegnir la tradizion e la religion cristiana percheche noi partegnon a la religion cristiana. Aldidanché se peissa che la scola, o n ent publich, cogne esser neutral. L'è n gran fal. Chesta sort de neutralità no va ben. La religion cristiana catolica partegn a noscia storia, a noscia vita e donca pissar de la tor demez da la scola l'è na violenza che ge vegn fat ai bec. Perché ge tor demez a nesc bec na picola orazion e l segn de la crouse che i li tegne apede a Die? Perché no tacar via la giornada ge sporjan nesc picoi a so agnol, percheche i li varde via? L segn de la crouse l'è n segn de amor, na sintesa de valores universai; la crouse la ge rejona ence a chi che no creit."

Ma l Vangele no ensegnel a ge jir encontra ai autres?

"Sci, ma chest no vel dir se tor a noi entesc. Gio no ge impone ai autres, ma no posse renunziar a chel che son, percheche fossa na "abiura" de la fe. Gio vae d'acort con valgugn canche me confronte, canche aprijie ence le robe de l'auter e son bon de veder te l'auter no n valivamente ma l ben che l'è. L bonism nesciugn lo vel. Chest l'è n argument n muie atual, la gejia rejona de bontà e no de bonism. Canche l Papa l'ha chiamà i capi de dute le religion a Assisi, l'è stat l moment en comunion anter dute le religion e dapò l moment de la orazion e chiò duc à preà per so cont te strutture desvalive. L fat de voler meter dut sul valif livel ne tol noscia identità, noscia storia. N popol che no à la percezion de soa storia, no va niò. I musulmegn no ne domana mia chest. Ic ben i è forc te soa storia e soa tradizion religiosa. Se noi assane mingol più de amor per noscia vita cristiana... No podon dir te l'inom de n dialogh faus che dute le religion le è medeme. Saer che l fi de Die, Gejù, l'è mort su la crouse per ne salvar duc, ence me, l'è valch che cogn me tociar!"

Se vegnissa n grop de musulmegn a Ve domanar n post per soe orazion, co ve comportassade?

"Ge conzeder ai musulmegn gejie e lesc de cult cristian no l'è nience da ipotisar, percheche l'è lesc consacrà al cult cristian. Ma i musulmegn no se fasc nesciuna marevea se i cristiegn no ge lascia le gejie percheche ic con soa moschea i fajessa valif. Gio ge l dajesse n post per soe orazion ma che no dovente na roba stàbola percheche canche i musulmegn prea te na sala, i la conscira soa, desche n lech sacro e donca "inviolabile". Autra roba fossa ge dar ogne tant na sala per n moment de orazion."

Èl de giusta per Voi ge enjignar le moschee?

"Na, i lesc de orazion l'è de giusta ge i enjignar ma le moschee no. L conzet de moschea l'è desvalif dal post de orazion percheche la

moschea l'ha ence duta na attività de propaganda, e chiò l teren l'è n muie delicat. La moschea l'è proprio l segn de la visibilità islamica te n contest."

No podessei far propaganda ence olache i prea?

"Noi no fajan catechism te gejie. La gejie vegn rresservada per l cult a Die. La sacralità del post cogn vengnir mantegnuda, per noi e per ic. Aboncont gio peisse che sie giust ge troar n post per le orazion, piuttosto che lasciar che i pree per strada."

Gheddafi l'ha dit che "col gremen de nosce femene talaron possess de vosce tere", no aede tema?

"A mi chel che me fasc più tema l'è veder tante de familie che se desfas, l'è veder na fe cristiana tebia. Chel che me fasc tema l'è la mencióna de vocazion a la vita sacerdotala. Me sà semper che jon a cerir le cauje dal de fora. No me fasc tema la forza di musulmegn ma noscia debolezza."

Ti confron de le femene musulmane che no è bone de se integrar che se peles far, da cristiegn?

"N muie de oute a la gejie ge è stat dat la colpa de far proselitism. Ma gio peisse a nesc misionaries. Se no fossa stat per ic, i bec te la foresta amazonica no aessa nience emparà a lejer e scriver. L dialogh pel vegnir fat ence ge fajan cognoscer noscia fe, ma no per i portar a duc i cosc da la noscia. Sul troi de mia vita è cognosciù familie musulmane ma no ge è mai emponù a nesciugn de batejar i fies e nience de vegnir te gejie. Cotante oute enveze che ge è rejonà de Gejù Crist e de la beleza de mia vita de fe e per chest ic è resté istesc musulmegn. Ge vel ge far descorig che l'enconter con Gejù fasc più bela e degnitosa la vita, soraldut chela de le femene."

Aede amò rejonà de chisc argomenc anter voi preves?

"Ence noscia val dant o dō vengnarà tociada semper de più da l'aspet multireligious e multicultural. Per chest l'è de besegn de descorig endò danef la beleza de noscia fe. L'è na gran ignoranza per chel che varda la fe cristiana. Noscia jent no è bona de sostegnir n descors fon su la fe, canche vegn i testimonies de Geova te nosce ciase fajan amò la fegura di pauperes. Gio peisse che l'enconter pel vegnir demò se sion forc te noscia fe. E dapò ge vel stima e se scutar l'un l'auter. E troar regole de convivenza pazifica. Respet de la dignità e de le legi senza che chest domane la neazion de la fe."

Te n mond dominà da l'utol e dal mercià, l'è ence n gran ciamp per colaborazion possibole anter chi che creit. Dessema se pel ge dar endodanef n'enema a la sozietà: spartir i padimenc di popoi, cerir de arjonjer la giustizia, la solidarietà e la pasc l'è doveres che met adum duc chi che creit."

Intervista de Monica Cigolla